

# Dörfligeischer 2013

## 65 Jahr (1948-2013)

Wüu dr Maya-Kaländer am Ändi isch, hätt d' Wäut söue ungergo,  
Als Geischer isch üs das egal, mir si glich a d' Fasnacht cho,  
Mir hei üs wie ne Moore gfröit nume vor luter Geischer z' stoh,  
Drum froge mir üs "nundedie" - was machet Dir no do ??

S'isch haut nume es chlyses Tröimli gsi ...

\*\*\*\*\*

Mir Geischer si füüfesächzgi, dasch e schöni Zahl,  
Doch wie alt me isch, das isch doch ganz egal,  
Mir fühle üs no jung u tüe gärn umejäte,  
Drum si mer jetze do u tüe als Oldies räppe !

\*\*\*\*\*

Der Spatestich für d' Stades de Bienne dä isch jetz ändlech cho,  
I zwöi Jahr sött' de die Arena würclech ds Buschang schto,  
Mir hoffe füre FC Biel sig das de nid scho z' spoot,  
Wenn das Comité so wyter macht, isch dä Club denn klinisch tot !

\*\*\*\*\*

Üsi Heilsarmee tuet d' Schwyz am Concours verträte,  
Die wei würclech uf Malmö ufe eis go jäte,  
Das git e-n-Uftritt dört, e ganz e scharfe,  
Mir gö de ou no mit als Ängeli mit Harfe !

\*\*\*\*\*

Mir Geischer si dänk alli ar Kultur intressiert,  
Und verfolge alles was do z' Biel passiert,  
Letscht' Summer ufem Expo-Park do hetts tschätteret u dräiht,  
Frei nachem Tingueli hett dr Cyclope sys Oug verdräiht,  
Wie das tuet und macht isch toll und aui si ganz erregt,  
Denn ändlech hett sech uf däm brache Gländ mou öppis bewegt !

\*\*\*\*\*

Im Stöckli tuet der Stöckli jetze hälfe regiere,  
Über wichtigi Gsetz tüe sy stundelang parliere,  
Profässore, Rächtsverdräier, äs sy alls gschtudierti Gseue,  
Do chönnt me doch erwarte, dass die richtig zeue !

\*\*\*\*\*

Bonjour, bonjour les nouveaux au conseil municipale,  
On chante de vous maintenant aussi au carnaval,  
Si vous allez nous fait chier, nous vous tirons le nez,  
Ou les cheveux, sauf à un, qu'est déjà déplumé !  
Bonjour, bonjour !

\*\*\*\*\*

Im Schi-Wältecup gits jetz öppis Nöis: Belüchtig uf allne Pischte,  
Das alles choschtet e Hufte Gäld, do cha me nid verzichte,  
Mir wüsse worum und säge's euch, das hett e guete Grund,  
Wüus scho lengschtens fiischer isch, wenn der erscht Schwyzer im Ziel aachunnt !

\*\*\*\*\*

Vo letscht fahre mir vo Port über d' Schleuse richtig Madretsch zue,  
Do mäudet usem Navi im Geischerouto so ne Chue :  
"Nehmen Sie im Kreisel die zweite Ausfahrt rechts", hett die gseit,  
Derby hett's vor der MÜVE gar kei Kreisu wyt u breit,  
Jetzt stöh mir zmitts ir Bousteu wie kläpfti Affe eifach do,  
Schlussändlech hei mir wieder usegfunge u das de eso:

Mit inestäche umeschlo dürezieh u wytergo .....

\*\*\*\*\*

Üsi reformierte Chiuche wott kei Fasnacht meh,  
Im Wyttebachsaal chasch üsi Kultur drum nümme gseh,  
Mir finge's total dernäbe - die müesse jo nid plääre,  
We sech d' Chiuche gäng wie meh und meh tuet lääre !

\*\*\*\*\*